

Sold out!!!

Mañan anochi den Cas di Cultura 'Hey...Ta Pasco!'



Entrada Pre-benta Afl. 40 na Porta Afl. 50

Entrada ta inclui un recepcion di "Wine & Cheese"

Ticketnan obtenibel na: • Cd's & More • Cas di Cultura • Magic FM • Bo Guia FM

ORANJESTAD - Cu masha orguyo nos mester anuncia cu e concierto di mañan anochi di e hoben cantante Edjean Semeleer ta completamente bendi, esaki ya caba ta un indicacion di con grandi e anochi aki lo bai bira.

Cariñosamente yama e baby di Aruba ya cu for di un edad chiquito Edjean tabata deleita tur hende cu un voz sin igual, y cu a crese bira un hoben cu un inspiracion y amor masha grandi pa musica, un hoben cu un carisma pa tur hende, cu un stimacion pa su isla di Aruba y su passion cu ta musica.

Edjean un hoben talentoso y perfeccionista, cu ta caracteristicamente riba cualquier produccion cu edjean presenta, e cancion exitoso 'Pordona Mi' sigur ta un bon ehempel, sin lubida su produccion 'Mi Pais' dedica na su isla stima Aruba anto tur esaki ta sin menciona su produccion nan di fin di aña esta 'Hey...Ta Pasco!' Vol 1, Vol 2 y Vol 3. Cada produccion a conta cu exitonan cu tabata briya den e prome posicionnan di e topnan di nos radio-emisoranan local, ademá Edjean Semeleer tabata 'Rey di Dande' 2004 organiza pa Sr. Harry Croes cu ta consagre como e prome hoben pa conquista e corona maximo di fin di aña. Tambe Edjean a participa den varios festivalnan y conciertonan unda e sea e ta deleita e publico cu su cancionan bunita tambe el a yega di sinta den e cuerpo di hurado buscando talentonan nobo. Su participacion den e competencia di 'Sparkling Tour' di aña pasa ta uno cu no por scapa bo memoria.

Despues di a pon asina hopi produccion riba mercado, ta yega e momento pa Edjean subi stage, pero e biaha aki deleita su publico cu su prome concierto titula 'Hey... Ta Pasco!'. Pa e anochi y concierto special aki Edjean a selecciona temanan di fin di aña, combina cu algun tema masha popular y tambe cancionnan cu lo trece recuerdonan di Pasconan cu ya caba a pasa, cu sigur lo hiba bo den un mundo di nostalgia. Un orquesta bou direccion di Hilward Croes y musiconan di taya lo acompaña Edjean y cu artistanan invita, e comeback special di Gloria Vega riba esenario, bin scucha Erin Croes e biaha aki cantando un precioso tema, Edwin Abath lo tey cu su voz unico pa e deleite di e publico presente y sin lubida e pikardia y carisma di Jeanedy Semeleer.

Mañan anochi ya caba pa 7or e portanan di Cas di Cultura lo ta habri pa tur hende goza di un tremendo wine & cheese tasting



danki na Carribean Overseas y Romar Trading, y pa despues pa 8:00 pasa pa e sala principal pa sinta goza di algo mas di 2 ora di un concierto special prepara pa caricia bo oido. Un decoracion di esenario special prepara pa Lia Maldonado y crew cu un danki special na Kestboom Landia.

Edjean Semeleer kier a duna un danki special na tur esnan cu a coopera en grandi cu e concierto aki y na e pueblo di Aruba pa e sosten y apoyo di semper y kier a termina cu e mensahe aki: 'Na tur mi fanaticonan masha danki pa e apoyo di semper, Mi ta spera di curazon di por sigui conta cu boso sosten! Na mi dushi pueblo Arubano masha danki pa aprecia y apoya bo yiu di tera. Aruba y mundo henter Feliz Pasco y un Prospero Aña 2007 yena cu bendicion, amor, exito, paz y felicidad!' Na Edjean y su elenco tur clase di exito pa mañan anochi.